

16 AUG 1998

AGONG UTUS TAHNIAH KEPADA PRESIDEN HABIBIE

KUALA LUMPUR, 16 Ogos (Bernama) -- Yang di-Pertuan Agong Tuanku Ja'afar mengutus ucapan tahniah kepada Presiden B.J. Habibie sempena ulangtahun kemerdekaan ke-53 Indonesia esok.

Seri Paduka, yang menyatakan syukur dengan hubungan baik dan kerjasama rapat antara Malaysia dan Indonesia, berharap hubungan itu akan terus dipertingkatkan.

Menurut kenyataan Wisma Putra hari ini, Seri Paduka berdoa supaya Indonesia dapat menyelesaikan apa juga masalah dan cabaran yang dihadapinya sekarang.

"Beta dan Raja Permaisuri Agong berdoa agar Presiden Habibie dapat meneruskan penerajuan kepimpinan negara ke arah kemakmuran dan pembangunan ekonomi yang lebih pesat," titah Tuanku Ja'afar.

Perdana Menteri Datuk Seri Dr Mahathir Mohamad, dalam perutusan serupa kepada Habibie, turut mendoakan agar Habibie dan rakyat Indonesia terus tabah menghadapi cabaran masa kini serta sentiasa diberkati dan dilindungi Allah.

"Dengan adanya usaha gigih kita bersama, saya yakin bahawa kita akan dapat terus mengeratkan lagi tali persahabatan dan hubungan silaturrahim yang istimewa antara rakyat Malaysia dan rakyat Indonesia," kata beliau.

Menteri Luar Datuk Abdullah Haji Ahmad Badawi, dalam perutusan kepada rakan sejawatannya Ali Alatas, percaya suatu hari nanti sejarah akan membuktikan bahawa rakyat Indonesia berjaya mengatasi dengan cemerlang segala masalah yang mereka hadapi sekarang.

-- BERNAMA

AFY NAK